

101





明音類選序

下  
禮  
部  
印  
信

同  
德  
書  
印

百  
年  
之  
印

明音類選。奚以編也。類選。治世之音。用昭隆盛。于無窮也。屬者。予講學于粵洲。諸笏絃誦詠詩。各選已往遺音。無慮數百家。廊廟山林。鉅公畸士。見存者。方將轍漢魏。以追風雅。則不與焉。然所見人。殊門人黎子民表。乃更訂定。編既成。潘上舍光統。捐貲刻之。予乃為序云。序曰。嗟乎。詩豈易言哉。風雅之所以異於頌者。托物比興。言其志而已矣。頌則紀盛德。告成功於神明。可以觀興而羣怨。亡與焉。是故二南正而不變。觀興備矣。然行露。標梅。江



汜野麇則羣怨之宗也。邶鄘以下，綱常變而懲創萌焉。至于幽變而不失其正者乎？東山鷓鴣風也。七月則肇雅矣。卷阿公劉雅也。河酌則兼風矣。繁簡惟時，以贊王化。何周召二公之聖於詩也。多識庶類，匪學弗獲。茲所以異於匹夫匹婦之詞與。淮南有言：鹿鳴興於獸，為其見食而相呼也。關雎興於鳥，為其雌雄之不乖居也。聲應生變，必連及蒿芩荇菜，而後變成方，以為音焉。劉伯溫之旅興，汪朝宗之壯遊，若倦鳥風林之類。至於吳下四傑，嶺南五先生，大家輩出，莫不比興成音。其深於詩者

平，乃若皇矣用之者八轉。北山用或者三闕，演章法也。蕩之文王曰咨，抑之其在于今，效書誥也。桑柔前八句者，其章八。後六句者，其章亦八。廣曲暢也。大東引物，則饑殍捋也。連類則箕斗女牛，闡幽竒也。景濂父子之送寄長篇，蓋亦祖之。女子善擗藻者，白華之外，谷風及氓而已。然其如悔恨何。宋氏之題郵亭，可謂顛沛不失其貞者矣。作家鳴盛，莫可覩縷。明音得自風雅，安數唐哉。陶淵明嘗論詩矣，曰：寧效俗中言，是古詩貴雅不貴俗也。杜少陵嘗論詩矣，曰：晚於詩律細，是律詩貴細不貴



粗也音也者與時高下通乎政者也吾見近世古詩則以綺靡為精工律詩則以粗豪為氣格然則徐庾之玉臺優於蘇李之河梁蘇頲之輕花捧觴岑參之柳拂旂露反不如羅隱之天地同力韋莊之萬古坤靈矣觥觥馬非馬其可乎哉梁陳之體足以致寇趙宋之體不能退虜詩三百而蔽以一言蒼姬所以為有道之長也變而不失其正吾於風雅體三致意焉毋邪尔思盍其做諸

嘉靖戊午仲春既望南海泰泉山人黃佐序

黃佐

黃氏

明音類選詩人名氏

皇明風雅因明詩選粹所列姓名邑里而廣緝之今做其法益以爵謚具列于左

劉基

伯溫青田人御史中丞封誠意伯謚文成

汪廣洋

朝宗高郵人中書右丞相封忠勤伯

戴良

九靈金華人徵士

王冕

元章會稽人諮議參軍

孫炎

伯融句容人江南行省都事

陶安

主敬當塗人翰林國史院學士

詹同

同文婺源人武昌籍學士承旨兼尚書



張以寧

志道古田人侍讀學士

宋濂

景濂浦江人學士承旨謚文恪

王禕

子充義烏人翰林國史待制

魏觀

把山蒲圻人蘇州知府前侍講學士

梁寅

孟敬臨江人

胡翰

仲申金華人衢州府學教授

高啓

季迪吳縣人戶部侍郎

吳伯宗

名祐金谿人前武英殿大學士

孫蕡

仲衍南海人蘇州府經歷前典籍

甘瑾

彦初餘干人嚴州府同知

唐肅

處敬會稽人翰林國史院應奉

袁凱

景文華亭人監察御史

劉永直

宗弼潁州人浙江按察司僉事

楊訓文

克明揚州人禮部尚書

吳琳

朝錫黃岡人刑部尚書

周湏

伯寧上元人刑部尚書

牛諒

士良東平州人禮部尚書

夏煜

允中江寧人

朱夢炎

仲雅進賢人禮部尚書

楊基

孟載吳縣人山東按察使



張仲簡 元敬蘇州人

張孟兼 名丁金華人山西僉事

錢宰 子予山陰人國子博士

黃哲 庸之南海人前翰林國史院待制

宋訥 仲敏滑縣人國子祭酒

王行 止仲吳縣人號半軒

劉仔肩 汝弼鄱陽人

涂穎 叔良進賢人太常博士

張羽 來儀烏程人太常寺丞

徐賁 幼文蘇州人廣東參政

黃肅 子邕建昌人工部尚書

李德 仲脩番禺人漢陽縣教諭

陶誼 漢生天台人禮部員外郎

王佐 彦舉河東人寓廣州給事中

顧祿 謹中華亭人太常博士

謝肅 原功上虞人福建僉事

蘇伯衡 平仲眉州人寓金華翰林院編脩

貝瓊 廷琨崇德人國子助教

滕毅 仲弘鎮江人

熊鼎 伯穎臨川人



郭奎 子章巢縣人

顧觀 利賓丹徒人寓紹興監察御史

任原 本立休寧人管軍萬戶

劉伯序 名秩豐城人崇明知州

宋璩 仲珩濂子中書舍人

王蒙 叔明湖州人

吳植 子立嚴州人

藺以權 世衡襄陽人應天府尹

王佑 子啓泰和人

董良史 名紀上海人江西僉事

陳汝言 惟允南康人濟南府經歷

劉璉 孟藻基子江西參政

劉崧 子高泰和人國子司業前吏部尚書

林鴻 子羽閩人膳部員外郎

張璧 景辰陳留人

貝翱 季翔崇德人楚府紀善

張經 孔升蕭山人國子助教

朱孟辯

張紳 士行濟南人浙江布政使

程煜 彥明揚州人寶坻縣丞



趙介 伯貞番禺人

史公謹

吳雲 友雲宜興人湖廣參政

鄭君貞 名桓歙縣人河南參政

浦源 長源無錫人晉府引禮舍人

黃玄 玄之福州閩縣人

許繼 士脩臨海人刑部主事

王澤 叔淵天台人華亭縣丞

藍智 明之崇安人廣西按察僉事

許廷慎 名伯旅黃巖人刑科給事中

朱昇 彥升無錫人

胡直 敬方吉水人

華幼武

王紳 冲縉禕之子國子博士

程本立 原道崇德人僉都御史

練子寧 名安新淦人御史府右副都御史

唐愚士 名之淳肅之子翰林院侍讀

方孝孺 希直寧海人翰林院文學博士

周是脩 名德泰和人衡府紀善

釋來復 見心南昌人



釋宗泐

釋機先 天祥

張三丰 名全一寶鷄人

鄧羽 南陽人武當山道士前青陽縣尹

宋氏女子 金華人

右國初至洪武末革除年間凡九十二人內  
詹天驪卽詹同別號因楊詩抄分爲二人八  
卷袁凱詩五首誤錄一首在後亦非二人

胡虛白 名奎海寧人寧府教授

解縉 縉紳吉水人交趾叅議前翰林院學士

楊士奇 名寓廬陵人少師兼華蓋殿大學士

管訥 時敏松江人楚府長史

胡儼 若思南昌人太子賓客前祭酒兼翰林院

姚廣孝 卽僧道衍復姓賜名蘇州人太子少師

夏原吉 維詰湘陰人戶部尚書謚忠靖

胡廣 光大吉水人文淵閣大學士謚文穆

楊榮 勉仁建安人少傅兼謹身殿大學士謚文

黃淮 宗豫永嘉人少保兼武英殿大學士謚文

金幼孜 名善新淦人少保兼武英殿大學士謚

楊子東



劉績

孟熙會稽人

王侗

孟揚福州人翰林院檢討

王誼

內敬紹興山陰人

胡澐

源絜武進人禮部尚書謚忠安

習韶

尚鏞永豐人兵部郎中

鄭嘉

元亨山陰人

劉師邵

績之子

晏鐸

振之蜀人

施敬

孟莊錢唐人

王紱

孟端無錫人

王恭

安仲福州人翰林院典籍

方行

明敏黃巖人

楊溥

弘濟石首人少傅兼大學士謚文定

鄒緝

士熙吉安人春坊庶子兼翰林侍講

王懌

內悅諡第溧水知縣

吳溥

德潤崇仁人國子司業

瞿佑

宗吉錢塘人周府長史

徐琢

德熙

曾榮

子啓吉安永豐人少詹事兼翰林侍讀學士

李昌祺

名禎廬陵人河南左布政使



梁潛 用之 泰和人 翰林脩撰 兼春坊贊善

王洪 希範 仁和人 前翰林脩撰

陳璉 廷器 廣州東莞人 禮部右侍郎

王直 行儉 泰和人 吏部尚書 謚文端

王汝玉 名璉 蘇州人 春坊贊善

周忱 恂如 吉安人 工部尚書 謚文襄

章敞 尚文 山陰人 禮部左侍郎

王英 時彥 金谿人 禮部尚書

逮昶 光古 覃懷人

陳觀 思賢 南海人

李時勉 名懋 安福人 國子祭酒 謚文忠

陳敬宗 光世 慈谿人 國子祭酒 謚文定

周述 崇述 吉安人 翰林侍讀 學士

周孟簡 吉安人 編脩 長史

王達 達善 無錫人 翰林侍講 學士

張迪

馬德華 閩人 泉州同知

廖致遠

牟倫 敘州人

馬鐸 子孟聲 長樂人 翰林院脩撰



劉球 求樂吉安人翰林院侍講

魏驥 仲房紹興蕭山人南京吏部尚書謚文靖

黎擴 之大臨江人蘇州府教授

謝績 台州人

周敘 功敘吉水人翰林侍講學士

高壁 貴明山陰人

金誠 誠之番禺人刑部主事

于謙 廷益錢唐人少保謚肅愍

蕭鉉 孟勤泰和人尚書兼學士入閣

徐有貞 元之蘇州人尚書兼大學士封武功伯

許彬 道中寧陽人侍郎兼學士入閣

薛瑄 德溫河津人侍郎兼學士入閣謚文清

曹鼎 萬鍾寧晉人吏部侍郎兼翰林學士謚文忠

郭登 鳳陽人定襄伯

劉定之 主靜永新人吏部侍郎兼翰林院學士謚文安

張和 節之崑山人浙江副使

張楷 式之鄞縣人僉都御史

祝顥 惟清長洲人山西參政

蘇平 秉衡海寧人

蘇正 秉貞平之弟



朱顯 子榮山陰人

劉儼 宣化吉水人 太常少卿兼翰林侍讀 謚文

李孟昭 名進嘉興人 訓導

劉鉉 宗器長洲人 少詹事兼侍讀 學士 謚文恭

唐豫 用之南海人

劉昌 欽謨蘇州人 廣東參政

夏寅 正夫華亭人 山東布政使

劉珣 叔溫壽光人 少傅兼大學士 謚文和

岳正 季方灤縣人 興化知府前翰林脩撰

吳與弼 子傳臨川人 徵士

王儼 廷貴武進人 南京禮部尚書

馬文升 負圖鈞州人 吏部尚書 謚端肅

楊守陳 維新郵縣人 吏部侍郎兼學士 謚文懿

柯潛 孟時莆田人 少詹事兼翰林院學士

劉溥 原博蘇州人

童軒 士昂鄱陽人 禮部尚書

馬軾 敬瞻北京人 欽天監博士

李齡 景齡潮陽人 詹事府丞

成始終 敬之無錫人 湖廣僉事

胡謚 廷慎會稽人 山西副使



張璨 蘊之崑縣人

史鑑 明古吳江人

張通 九衢鳳陽人都督僉事

王清 一寧濟寧人都指揮

徐溥 特用武進人少傅兼大學士謚文靖

丘濬 仲深瓊山人少保兼大學士謚文莊

彭華 彥實安福人尚書兼大學士謚文思

何喬新 廷秀建昌人尚書謚文肅

張寧 靜之海鹽人汀州知府

陳政 宣之番禺人雲南副使

沈周 啓南長洲人

李東陽 賓之茶陵州人順天籍少師兼華蓋殿

劉大夏 時雍華容人兵部尚書謚忠宣

倪岳 舜咨上元人杭州籍禮部尚書

王徽 尚文南京人刑科給事中

陳獻章 公甫新會人翰林院檢討

莊昶 孔陽江浦人南京吏部郎中

謝鐸 鳴治黃巖人禮部右侍郎

林榮 孟仁番禺人雲南副使

張泰 亨父太倉人翰林院脩撰



羅倫 應魁吉安永豐人翰林脩撰謚文毅

章懋 德懋蘭谿人禮部尚書謚文懿

張弼 汝弼華亭人南安知府

聶大年 壽鄉臨川人

黃瑜 廷美香山人長樂知縣

程敏政 克勤休寧人詹事兼翰林學士

李承箕 世卿嘉魚人鄉貢進士

祁順 致和東莞人江西布政使

周瑛 梁石莆田人湖廣左布政使

邵珪 文敬宜興人知府

吳寬 原博長洲人禮部尚書兼翰林院學士謚文定

楊一清 應寧雲南人少傅吏部尚書兼謹身殿大學士

文林 宗儒蘇州人温州知府

王鏊 濟之吳縣人少保戶部尚書兼武英殿大學士謚文恪

劉忠 司直陳留人少傅禮部尚書兼武英殿大學士謚文肅

林俊 待用莆田人太子太保刑部尚書

梁儲 叔厚順德人少師吏部尚書兼華蓋殿大學士謚文康

楊時秀 名榮餘姚人工部主事

趙寬 栗夫吳江人廣東按察使

儲懔 靜夫泰州人戶部侍郎謚文懿



邵寶 國賢武進人南京禮部尚書

張詡 庭實番禺人南京通政司參議

王雲鳳 應韶和順人副都御史

蔣冕 敬之全州人少傳兼謹身殿大學士

石珪 邦彥 蕪城人少保兼武英殿大學士謚文

王鴻儒 懋學 南陽人戶部尚書謚文莊

毛紀 維之萊州人少保兼大學士謚文簡

周旋 克敏 慈谿人給事中

釋九臯 妙聲吳縣人

王司綵 女官

右末樂至成化凡一百四十二人

李夢陽 獻吉慶陽人居開封江西提學副使

何景明 仲默信陽人陝西提學副使

邊貢 庭實歷城人戶部尚書

顧璘 華玉蘇州人南京籍刑部尚書

徐禎卿 昌穀蘇州人大理評事

顧清 士廉華亭人禮部侍郎

李麟 仁仲鄞人布政使

何孟春 子元郴州人吏部侍郎

黃衷 子和南海人兵部侍郎



熊倬 士選豐城人監察御史

王九思 敬夫鄆縣人翰林院檢討

張琦 君玉慈谿人知府

王守仁 伯安餘姚人南京兵部尚書封新建伯

豐熙 原學鄞人翰林院學士

張鳳翔 光世洵陽人戶部主事

都穆 玄敬吳縣人太僕少卿

朱應登 升之寶應人提學副使

孫一元 太初關中人

康海 德涵武功人翰林院脩撰

魯鐸 振之景陵人國子祭酒謚文恪

祝允明 希哲長洲人應天府通判

王廷相 秉衡儀封人太子太保兵部尚書

鄭善夫 繼之福州人南京吏部郎中

林庭棊 利瞻福州閩縣人太子太保工部尚書

唐寅 子畏蘇州人

徐問 用中武進人南京戶部尚書

李時 宗易任丘人少傅尚書謹身殿大學士謚文康

孟洋 望之信陽人南京大理寺卿

蕭世賢 若愚桐城人按察副使



王韋 欽佩徽之子提學副使

張邦奇 常甫慈谿人太子賓客南京兵部尚書

陳錫 佑卿南海人應天府尹

黃鞏 伯固莆田人南京大理少卿

劉節 介夫大庾人刑部侍郎

崔澂 淵甫吳江人

呂柟 仲木高陵人南京禮部侍郎

周金 子庚武進人南京戶部尚書謚襄敏

方鵬 時舉崑山人南京太常寺卿

韓邦靖 汝慶朝邑人兵部郎中

方豪 思道衢州人湖廣副使

唐龍 虞佐蘭谿人刑部尚書

王思 宜學泰和人翰林院編脩

張峩 蜀望成都人福建左布政使

張治道 時濟長安人戶部郎中

尹襄 舜弼永新人司經洗馬

薛蕙 若采亳州人吏部郎中

劉儲秀 士奇咸寧人兵部尚書

戴欽 時亮柳州人刑部郎中

蔣山卿 子雲儀真人廣西叅政



舒芬 國棠進賢人翰林院脩撰

朱豹 子文上海人福州知府

陳沂 魯南鄆人南京籍行太僕寺卿

王廷陳 雅欽黃岡人前翰林庶吉士

馬汝驥 仲房綏德人禮部侍郎謚文簡

王謳 舜夫西安人山西僉事

張治 文邦茶陵州人太子太保吏部尚書文淵閣大學士謚文隱

周祚 天保山陰人給事中

廖道南 鳴吾蒲圻人翰林侍講學士

陞鈇 舉之鄆縣人山東提學副使

梁世驃 應房順德人貴州僉事

樊鵬 少南信陽人刑部郎中

王寵 履吉蘇州人

高叔嗣 子業祥符人湖廣按察使

袁泰 永之蘇州吳縣人廣西提學僉事

陳束 約之鄆人提學副使

郭廷序 循夫海陽人貴溪知縣

孫學古 汝遂蕭山人東莞知縣

黃省曾 勉之蘇州人鄉貢進士

梁有譽 公實世驃之子刑部主事



釋古淵 慧深黃梅人

右弘治至嘉靖凡七十人通前共三百四人

明音類選詩人名氏終

明音類選目錄

第一卷

五言古詩一百三十首

第二卷

五言古詩一百九首

第三卷

五言古詩一百二十三首

第四卷

七言古詩長短句九十六首

第五卷



七言古詩長短句一百六十六首

第六卷

七言古詩長短句九十九首

第七卷

七言古詩長短句一百八首

第八卷

五言律詩一百五十八首

第九卷

五言律詩二百四十八首

五言排律二十三首

六言律詩二首

第十卷

七言律詩一百二十六首

第十一卷

七言律詩一百八十五首

七言排律五首

第十二卷

五言絕句六十二首

六言絕句十二首

七言絕句一百四十四首



風雅體十首

右古今詩通計一千八百六首

明音類選目錄終

明音類選卷之一

五言古詩

旅興二首

倦鳥異安巢。風林無靜柯。路長羽翼短。日暮當如何。

登高望四方。但見山與河。寧知天上雨。去為滄海波。

慷慨對長風。坐感玄髮皤。弱水不可航。層城岌嵯峨。

淒涼華表鶴。太息成悲歌。

寒燈耿幽幕。蟲鳴清夜闌。起行望青天。明月在雲端。

美人隔千里。山河杳漫漫。玄雲翳崇岡。白露凋芳蘭。

願以綠綺琴。寫作行路難。憂來無和聲。絃絕空長歎。



劉基





晨詣祥符寺

上馬鷄始鳴入寺鐘未歇  
草際起微風林端澹斜月  
僧房湛幽寂假寐待明發  
松徑斷無人經聲在清樾

晚同方舟上人登師子巖作

落日下前峯輕烟生遠林  
雲霞媚餘姿松柏澹清陰  
振策縱幽步披榛步層岑  
槿花籬上明莎鷄草間吟  
涼風自西來颼颼吹我襟  
榮華能幾時搖落方自今  
逝川無停波急絃有哀音  
顧瞻望四方悵然愁思深

遠遊篇

三山六鼇背翠水扶桑東  
鷄鳴上海日海面玻璃紅

仙人騎鸞鳳呼我遊雲中  
雲中有金闕謂是天帝宮  
明星列兩藩琪樹光玲瓏  
太一坐端門白髮映青瞳  
授我玉篆文赤蛇蟠九虹  
出入元化先壽命齊老童  
因逢青鳥使遂造東王公  
素女如蓮華歌喉弦管同  
碩盼動環珮振迅若輕鴻  
化為五色光倏然隨長風

秋夜曲

木落霜露繁烏啼夜方永  
起行望明月西風吹鴈影  
鴈飛一何急烏啼安所集  
徘徊不能寐望月空佇立  
佇立河漢傾誰家砧杵聲  
關山渺千里何處不傷情

感遇二首



暑退生夕涼。寒衣步微月。風來竹徑動。草暗螢光燄。  
佇立忽懷人。江河渺難越。白露下木葉。淒涼江海秋。  
江皋有鳴鴈。嗷嗷安所求。稻梁日蕭索。風雨徒離憂。

琴清堂

亭亭嶧陽桐。斲爲綠綺琴。絙之朱絲弦。彈我白雪音。  
虛堂夜迢迢。華月耿疎林。鳳凰天上來。虬龍水中吟。  
曲罷起太息。無人知此心。

壯遊奉柬諸閣老

汪廣洋

壯遊吳楚外。揚舲遡天風。名山浮紫翠。大江走蛟龍。

歷覽思超越。毛骨生冰雪。脫巾漉清湍。舉手弄明月。  
明月懸青銅。古人難再逢。牛渚委陳迹。我眉斂愁容。  
九華舞傴僂。窺見滄溟底。小孤立亭亭。徘徊女蘿裏。  
流宕鄱湖湄。峰巒愈出奇。幽深構樓閣。峭絕挂須彌。  
放意自陶寫。援筆灑秋泚。神恠連宵寘。魚鳥覺欣喜。  
路逢丹丘生。來自赤霞城。麻姑後飛舄。予晉迭吹笙。  
湖光歛艷開。雲壓蒲萄綠。狂引黃金壘。笑歌紫芝曲。  
左蠡素相得。當湖忽見迎。揚瀾平一掌。中有龜鼉行。  
振衣攀鵲巢。捫蘿踐苔石。厓氣凌空青。松花墜階白。  
舉首匡廬下。調笑烟霞間。屢會復屢往。今往幾時還。



叢蘭被路蹊芳草縈澗谷長飈和鳴鶴送泉驚飲鹿  
須臾面五老邀我山之陽授我長生訣兼遺洞玄章  
問我從東來迢迢泛鯨波三山得無恙十洲近如何  
傍招廣成子俯抱山中老鯉魚躍大江鵝鸞下天沼  
待以青精飴酌以白玉漿垂龍左耳潤吠犬靈苗香  
渴鳥漸斂翼拭目增晚碧朶朶金芙蓉憑虛落胸臆  
西南挺竒異江湖馳偉觀披披古蘭若丹靈耀嶺岷  
嘗聞遠法師堅坐東林下還許陶淵明共結青蓮社  
又聞李太白酷愛香爐峰長安卸塵鞅欲歸巢雲松  
往事既云遠願我復來此濯泉坐樹陰下洗巢由耳

綠髮雙青童採芳留我行我行欲不行月高須夜聲  
西山招我遊明日過湖水笑隔南浦雲遙謝數君子

遠遊陪師西征武昌

朝發庾公樓夕扣滕王閣長歌奮激烈清風蕩寥廓  
張帆江水秋伐鼓關月落予亦將遠游明當造黃鶴

銅雀妓

趙女美如玉輕盈掌上身翠眉長不掃長望西陵人  
酒闌歌舞罷臺榭坐生塵怨入漳河水悠悠秋復春

別知己

北風吹征帆飄飄西南馳山川聿脩阻霜露忽凄其



今日類選 卷一  
今我遠行邁○豈不念歲時○歲時豈不念○簡書良在茲○  
翻彼晨飛鴻○翱翔亦何之○感我同袍友○戚戚懷此離○  
此離雖可懷○觴酒當載持○各言崇令德○金石以爲期○

汴隄感懷

落日汴隄上○奄忽浮雲馳○草樹徧原野○茫茫天四垂○  
上有鳥嚶嚶○下有冢纍纍○世故念衰絕○焉知埋者誰○  
孤隋昔撫運○恃安忘險危○乃以耳目私○遂令骨肉疲○  
骨肉日以疲○耳目日以虧○平陸變滄海○中途歌黍離○  
持此鬱冲襟○涕下莫能揮○

夜直與架閣樂秉德期孫伯融不至

夔立碧玉鉞○對酌紫薇省○長風吹翠梧○初月下金井○  
幽懷鬱未開○短髮醉慵整○夜分群籟沉○窓虛燭花冷○

次陶遊斜川韻携子禮泛鄞江 戴良

百年信無幾○世相已俱休○偶懷開歲感○起爲川上游○  
鄞江東到海○時春雨增流○汎汎將何適○惟隨波上鷗○  
扣舷賞鳴瀨○推蓬睇崇丘○興至即呼酒○未恨無良儔○  
禮子飲勝翁○新詩亦粗酬○陶公斜川口○還復有此不○  
昔人視當世○同樂復同憂○兒能取翁言○於道更何求○

城東會飲送王天錫

陰崖斂暝霏○霜陸耀晴晞○蕭蕭落木多○綿綿衰草遍○



開冬感徂物。列飲會群彥。美醕溢流霞。談粲餘雄綯。  
時髦非我匹。清尊豈余戀。行矣送將歸。悵焉罷歡宴。  
引領阻雲從。搔首歎蓬轉。

送鄉友阮子敬

張以寧

君家重峯下。我家大溪頭。君家門前水。我家門前流。  
我行久別家。思憶故鄉水。况乃故鄉人。相見六千里。  
十年在揚州。五年在京城。不見故鄉人。見君難為情。  
見君情尚爾。別君奈何許。送君遽不堪。憶君良獨苦。  
君歸過江上。為問水中魚。別時魚尾赤。別後今何如。

蛾眉亭

碧酒雙玉甌。獨酌蛾眉亭。不見李太白。但見三山青。  
秋色淮上來。瀟然滿雲汀。安得五十絃。彈與蛟龍聽。

浩懷

宋濂

漆園欲齊物。伯陽期守玄。脩軌務絕絆。冲志在潛淵。  
夕陰宜蕙幌。晨陽煖石田。外膠一以遣。澹泊返自然。  
五圖非謬記。九籥有真詮。青青林間雨。勃勃谷竇烟。  
松花行將熟。采之釀虹泉。

送劉俊民先輩

劉君卓犖士。出自詩書青。眉目儼如畫。幽花眩晴書。  
踉蹌忽來謁。進退頗溫茂。自言宅偃師。家昔千金富。



大父名法從。纍纍印懸綬。文辭補元化。求者輒奔走。  
從此簪纓餘。矜壯事雕鏤。無食不鳧翠。有衣總文綉。  
蘭舟盟津水。蠟屐穀城岫。或騎紫騮馬。深林出從獸。  
黃鬚少年兒。執矢列先後。一簇巧中肋。驩聲溢郊囿。  
狼兔懸金鞍。歸來薦清酎。燕姬白如雪。時唱清角有。  
人意天上郎。雌伏不敢雉。一旦黃金盡。其事乃大謬。  
漁樵來爭席。雞犬或昂脰。憤來氣屢絕。十起九顛倒。  
折節去讀書。攻苦分句讀。初如蛇入筒。漸類雛脫鷄。  
把筆學爲文。衆色紛采就。又恐悞儒冠。雜藝亦兼究。  
雅琴辨宮商。古文參篆籀。六物推休祥。八卦占爻繇。

更參九箴法。俞穴別膚腠。圍碁與握槊。賭勝欲起鬪。  
不覺疾聲呼。有若熊虎吼。最便結風舞。唯恐技難售。  
偶逢玳筵張。肴核列飢餒。酒酣兩耳熱。徐起整衿袖。  
文鸞側鞞射。皓鶴仰寒囀。躡節盼盤鼓。迴旋逐音奏。  
雖得諸工隣。不博兩眉歛。使者天上來。會合誠辭若。  
負書亟從之。何啻杵投臼。三河及幽并。無地不馳驟。  
登高或吊古。感時更懷舊。恨無息肩所。若沉痾待灸。  
前年往龍漠。氣序異常候。八月雪即飛。一夜三尺厚。  
今年度庾嶺。熱氣甚蒸餹。老梅雖未花。鐵幹倚雲瘦。  
欲俟喘息定。陰厓聊宿踏。玉虺長過竹。矯首出嵌竇。



目光夾明鏡。鑠我汗如漚。閉目但待筮。有術不暇呪。  
 性命鴻毛輕。幾被鬼神蹂。年來自懲創。此險安可復。  
 俯思十載間。行事賤如畜。徒然各悲辛。寸祿焉能救。  
 即將巢雲松。終老友猿穴。予聞心鼻酸。宛若身在疚。  
 于時十月交。日月會龍狖。霜風吹人急。層衣悉穿漏。  
 百齡駒過隙。胡不重棲宿。須知學踐形。庶不慚載覆。  
 勺水當離尊。贈詩比糧糗。歸歟勿久留。吾言不能又。

擬古

梁寅

驅馬出東郭。松林見高墳。云是公侯墓。華表千層雲。  
 歲月既已遠。朽石生荆榛。虬蛇或內蟄。狐狸當書蹲。

勸兒歌其上。死者寧復聞。感此長太息。浮生若飈塵。  
 惟當勗令德。千載逝猶存。

冬日何可愛

胡翰

冬日何可愛。夏日何可畏。矯首問羲和。羲和不停轡。  
 寒燠相代更。天運自有常。但惜愛日短。不及畏日長。

鬱鬱孤生桐

鬱鬱孤生桐。託根鄒嶧顛。皎皎白素絲。出自岱畎間。  
 一朝奉庭貢。妙合良自然。桐以為君琴。絲以為君絃。  
 中含希世音。置君離別筵。征馬慘不嘶。僕夫跪當前。  
 君行千里道。豈惜一再彈。南風日渺渺。清商動山川。



和者音已寡聽者今亦難

擬古三首

高啓

纂纂墻下李。芄芄陂中麥。浩浩望遠塗。悠悠思行客。  
客行歲已盈。紆鬱傷我情。始知失群鴻。不若求友鷺。  
登山知天高。臨流識川阻。不遣懷同心。那知別離苦。  
別離不可久。寂寞不可守。自傷紅顏子。相思成皓首。  
朝日如不晚。行人會當返。  
美人一相見。遺我白玉環。上有雙雕龍。游戲在雲間。  
持此感深意。佩結無時閒。玉以比貞潔。環以明不絕。  
雲龍永相從。誰能使離別。

明星爛東方。北斗亦已旋。獨宿悲夜徂。空床藉蘭筵。  
鷄鳴整環珮。思奉君子筵。君子行未歸。新粧為誰妍。  
意踈覺去遙。咫尺越與燕。含情乏彤管。何以寫中愴。  
君如綆上瓶。妾若井底泉。不垂汲引惠。澄瑩徒終年。

明月灣

木葉秋乍脫。霜鴻夜猶飛。扁舟弄明月。遠度青山幾。  
明月處處有。此處月偏好。天闊星漢低。波寒芡荷老。  
舟去月始出。舟迴月將沉。莫照種種髮。但照耿耿心。  
把酒酌水仙。容我宿湖裏。醉後失清輝。西巖曉猿起。

毛公壇



欲觀漢壇符東上縹緲峯  
 葛花墜寒露夕飲清心胸  
 月出太湖水鶴鳴空澗松  
 真境久寥寂蒼苔闕靈踪  
 嘗聞綠毛叟變化猶神龍  
 世人豈得見偶許樵夫逢  
 攀險力易疲探玄志難從  
 歸出白雲外空聞仙觀鐘

夢遊仙

夢騎蒼麒麟手持白玉鞭  
 長風八萬里夜入通明天  
 正逢絳闕開謁帝陪群仙  
 飄飄紫霞佩杳靄青霓旃  
 命與衛叔卿共讀金蕊篇  
 玄文不可識謫歸一千年  
 驚寤忽長嘆虛空但雲烟

登西城門

登城望神州風塵暗淮楚  
 江山帶睥睨烽火接樓櫓  
 并吞何時休百骨易寸土  
 向來和黍地雨露長榛莽  
 不見征戰場那知邊人苦  
 馬驚西風笳鳥散落日鼓  
 嗚嗚城下水流恨自今古

尋照公

遠尋林下僧不識林下路  
 隔雲孤磬響因到繡經處  
 相對竟忘言夕陽在祇樹

薊門行

行行光祿塞望望單于臺  
 天寒水草盡萬里孤軍來  
 中國多荒土窮邊何用開



寓感

驚馬放田野。志本在豐草。偶遇執策人。驅上千里道。  
顧非乘黃姿。豈足辱君阜。負重力不任。哀鳴望穹昊。  
奈何相逢者。猶羨羈絡好。

酌謝翰林留別

啓與同郡謝君微同徵。又同官翰林。洪武三年七

月廿八日

上御闕樓。召對擢啓戶部侍郎。謝吏部郎中。俱以踰

冒辭即蒙。俞允賜內帑白金。放還于鄉。

江左稱謝家。奕葉多名人。君今復秀發。瓊枝邁風塵。

顧余忝鄉里。才華敢論美。丹詔偶見徵。雲蘿歛

起謁。帝入九關。咫尺瞻天顏。從茲謬通籍。接武

諸公間。朝侍青坊。讀夜陪玉堂。宿講罷分御。羨吟成

刻官燭。出入在兩宮。與君無不同。自慙本鷗鷺。亦得

隨鷓鴣。鳴朝朝禁門下。聽鷄共騎馬上國。多故人情親

似君寡。並命超列鼎。寵極翻憂驚。我叨掌國計。君佐

持銓衡。偕辭向明主。叩天聽。天語勅賚內帑

金。東還特相許。拜賜出皇都。人言似兩跡。月明照

宮錦。同棹入中吳。吳中故鄉道。兩歇秋光好。青山度

水迎。喜我歸來早。落日下長洲。分携忽解舟。如何到



家喜却有別君愁。別君去還邈。只隔吳江水。離思與  
秋長。蘆花三十里。來往片帆通。相期作釣翁。高歌雖  
鄙野。猶可贊皇風。

至吳松江

江淨涵素空。高帆漾天風。澄波三百里。歸興與無窮。  
心期弄雲月。迢遞辭金闕。晚色海霞銷。秋芳者蓮歌。  
久別釣魚磯。今朝始拂木。忘機舊鷗鳥。相見莫驚飛。

題李氏栖碧樓

吳伯宗

唐有謫仙人。風骨特高妙。晚愛栖碧山。閑心付登眺。  
桃花與流水。目擊領其要。遐觀窮有象。幽討入無竅。

不知誰相問。但覺遺一笑。聲落天地間。松風紫鸞叫。  
諸孫企高躡。異世頗同調。瑤樓睇空青。銀榜生光耀。  
予亦愛其人。臨風畫長嘯。

擬古三首

孫蕢

岐路一尊酒。送君當遠行。交持未及竟。絲管激哀聲。  
冉冉歲華暮。悠悠雲氣征。馳車戒往路。惻惻傷我情。  
我情默已傷。歡愛不可忘。昔為春花妍。今為秋草芳。  
秋草芳有時。夫君見無期。獨宿坐長夜。淚落如綆縻。  
白日儻回照。孤懷君所知。知君無迴波。浮生類轉燭。運盡歸山阿。



松栢夾長路。高墳起差峩。古來皆若此。咄咄將奈何。誰絃雍門琴。和此薤露歌。

日月逝朔望。推遷無時停。鼎鼎百年內。所為竟何成。賢者解斯理。達生外其形。良辰有美酒。日對賓友傾。迢迢閬風丘。奇樹秀瑤英。周王八駿沒。天路杳冥冥。

期羅浮蕭鍊師不至

石室松桂秋。涼風滌殘暑。柴門敞空曲。曠夕懷仙侶。巢笙久不至。鶴馭今何許。朗月流清輝。山中幾延佇。

寄王給事彥舉

休沐展遐眺。步出鍾阜阿。卉木春氣益。淮水揚素波。

泛泛波上鷗。游泳鮮羽儀。端坐愧此鳥。長遊成蹉跎。安得理歸楫。翩然解佩珂。揚舲過關右。鼓枻入江沱。友于事讌集。物候方陽和。酌酒南園上。與君同嘯歌。

會上人臨流亭

唐肅

長川流壘壘。華構鬱翹翹。暈飛涵綠淨。洞敞納鮮焮。遙窺眾峯碧。仰睇孤雲飄。開簾聞鷺鷥。俯檻見遊鯈。杜蘅旣春敷。芰荷復夏饒。以茲悟物理。於焉解天弢。微吟旣窈窕。永嘆遂逍遙。何當往濯纓。與子願同袍。

古意

袁凱

白日生東海。倏忽墮崦嵫。皓月方滿盈。斯須亦已虧。



淮陰有奇功。赫赫在一時。焉知束縛去。還爲兒女欺。  
天道每如此。人事安足悲。獨羨鴟夷子。輕舟去江湄。

從軍行

烽火塞上來。發卒備戎虜。翩翩長安兒。未勝弓弩。  
幸蒙車騎恩。出入在幕府。烽烟一朝息。歸來受茅土。  
翻笑李將軍。血戰自辛苦。

擬曹丕芙蓉池作

葱龍佳木陰。蕩漾綠水池。月出麗高城。流光溢前墀。  
芳草生路傍。馥郁隨風吹。臨軒酌芳醴。秉翰賦新詩。  
雖非賢主人。列坐皆瑰奇。而况同一心。相愛不復疑。

君看隨陽鳥。洲渚亦相依。四海皆兄弟。斯言豈爲非。  
願敦夙昔好。黃髮不可違。

偕友人早出郊

離群寡游豫。得朋殊繾綣。相將度春水。散漫入芳甸。  
班荆烟乍斂。摘花露猶泫。林鶯坐未出。沙鳥飛還見。  
遙山浮空翠。晴雲曳輕練。一聽野人言。復起滄洲願。

池上

秋池行樂去。池樹色已曛。露下如衣涼。月上風簾靜。  
饑禽墮疎竹。鳴蛩出深井。夜久人事息。蕭然諸念屏。  
早出田所



愧無經濟術○徒有茂異名○行游三十年○不見有所成○  
歸來得荒地○僂俛始學耕○方春多雲氣○甘雨亦時行○  
大澤含澄瀾○溝澮皆滿盈○清晨出門去○路與烟霞并○  
庶幾望秋實○敢懷勤苦情○日午有濁醪○揮汗且復傾○

遊西墅

吳王逐獸地○士衡聞鶴亭○古人不可見○荒原今獨行○  
遺堵儼若存○阡陌復縱橫○依稀極浦迢迢○時春城○  
江樹旣掩靄○露原花復晶○炎長煙覆漁屋○白水亂魚汀○  
山川豈云異○人事有消停○即此傷往時○聊復樂其生○  
寄言後來士○此理可自明○

下直懷北山隱者

載筆侍雲陛○向夕始餘閒○撫彼清冷觴○慰此憂戚顏○  
出軒月纔皓○臨街露已繁○廣庭行且止○脩檻去復攀○  
幽樹藹深翠○餘花發微殷○俯仰不知久○星漢忽西還○  
歸來空房卧○嚴城漏欲殘○鴉鳴九井動○劍珮亦珊珊○  
將隨夔龍後○祇肅謁重關○緬懷息心侶○遺世在雲山○  
焉能從之去○逍遙巖桂間○

京師歸別業

郊園草已遍○禰卉駐餘春○遊絲牽木杪○孤鶯鳴水濱○  
羈人懷舊居○日夕自傷神○遙遙千里途○豈復念苦辛○



欣然入場圃。兒女各來親。當軒釋負擔。拂去衣裳塵。老夫行役久。歸來志復伸。陶潛愛清風。張翰思故尊。援筆爲此詩。示我隣里人。

秋日東林宴坐

劉丞直

高秋坐虛館。颯然神慮清。迴飈颺踈雨。蕭洒集前楹。始忻塵雜遠。稍覺微涼生。簷鐸遙相答。林蟬時一鳴。物情各有適。吾生豈無營。

春日遊常真觀

楊訓文

携琴偶獨來。尋幽入芳林。深鳥歌寂坐。夕澹忘慮。振衣下崇岡。斜陽在歸路。

舟中望九華山

周湏

貞履無素期。勞生意恒窘。誰云戒戎路。曾是返初隱。水宿淹長晷。山行阻脩軫。縹緲對雄標。嶺岈發竒蘊。崖回氣如燠。峯去勢猶引。刻削冠青蓮。雕鏤轟丹笋。巖霞上斑剝。石乳下礪碕。山鬼崇文狸。淵靈閔玄蜃。瞻茲志藜藿。未遂采芝菌。卽事情已非。懷賢迹俱泯。潛吳愧梅福。去汶羞閔損。人德險未夷。天道明可准。臯蘭豈徒歇。巖桂芳未隕。歲暮山中人。寤言候歸軫。

賽小姑廟

育秀凌華嵩。標竒莫淮楚。陽闢啓神闕。陰沉開水府。



源源聚商舶，淵淵聞戍鼓。陳瑟會安歌，傳芭紛屢舞。  
椒漿既芬潔，桂棹方容與。日暮懷歸情，含睇望脩渚。

秋林高士圖

牛諒

林臯木葉下，江潭秋水生。靈飈蕩陰霞，落景涵虛明。  
手結芙蓉佩，目送孤鴻征。冲襟契玄賞，招搖千古情。

哀孫炎

夏煜

垂老戎馬間，相知復何有。幼與孫炎交，于今俱白首。  
炎也雅好詩，落魄惟耽酒。醉中有神助，不放持杯手。  
才豪不受羈，焉肯事田畝。精勤脫穎出，盤錯迎刃剖。  
浪迹帝王州，結交英俠藪。喈喈朝陽桐，濯濯新春柳。

南北暗兵塵，妖星下天狗。我皇入金陵，一見顏色厚。  
高談天下計，響若洪鍾叩。即拜丞相掾，奉身事明后。  
再分太守符，兼縮都官綬。括蒼實重地，豹虎白日吼。  
皇曰汝係炎，共性總制某。再拜謝不敏，寵命敢虛受。  
一年風俗淳，二年民物阜。三年遠人歸，上表請官守。  
文章曹劉亞，政事龔黃右。舊歲過金華，與炎適相偶。  
寒燈夜半花，春盤雪中韭。終宴竟忘疲，落月斜半甬。  
臨分各上馬，攬轡復立久。為言有小女，離家方襁負。  
今來已五周，見父能認否。未必到家期，封書附姑舅。  
置書篋笥間，纔隔兩月後。墨色尚未乾，語音猶在口。



胡為內變生○哭我平生友○復恐是夢中○仰天當戶嘯○  
斗柄昏建辰○月魄夕在酉○迺知真死矣○慟哭吞聲喉○  
復聞遇害時○扞刀落雙肘○奮怒髮衝冠○大罵血漂白○  
維時東南天○彗出芒如帚○淫淫苦雨愁○嘩嘩驚電走○  
冤兮早歸來○空山不可徂○我過孰與規○我病誰云灸○  
春酒釀薺薇○奠子墳山培○西京七葉貂○零落成草莽○  
既有千載名○焉用百年壽○我我馮公巖○與子同不朽○

登三夏故城

楊基

關前葉猶青○關後草已白○氣候本不殊○山勢有阻隔○  
風高鼓角勁○日落川塞黑○邊鴻一聲來○壯士亦變色○

秋月篇

黃哲

金商鳴素節○瑤律屆先秋○始見西陵月○嬋娟滄海頭○  
清規臨夜滿○澄影際天浮○媚浦沉珠迥○疑波淨練收○  
常懸鳩鵲署○初照鳳凰丘○碧落宵同映○銀潢曉共流○  
梁園生綺夢○陳榭感芳憂○爽洽征人袂○光含思婦樓○  
玉臺情未已○鸞鑑影空留○詎情盈虧屢○仍知晦朔周○  
關山隨別騎○淇水送行舟○願逐餘輝去○蘭臺奉夕遊○

過梁昭明太子墓

帝子降南浦○飄飄蒼桂陰○神飈迴震闕○玄跡闕坤岑○  
鳳陵輝璞蘊○龍沼媚珠沉○文藻絢華黻○芳芬揚素襟○



遺編軼正雅。曠代馳徽音。玉馬風雲變。金甌歲月深。  
霜蘭秋被。烟蘿夕翳。林采蘋思永。薦捐玦。遂幽尋。  
靈脩忽爾逝。歲晏勞予心。遼東鶴馭遠。緜嶺鸞笙吟。  
耿耿因懷昔。營營徒慨今。瑤華竟衰歇。惆悵雍門琴。  
十月二十二日四望山陪祀禮成呈諸執事時  
北征師還

玄明開朔序。禋類卜辰良。武成遵誓命。汾時備馨香。  
惟皇儼雍穆。對越思洋洋。凝旒仰坤墳。授律挾乾。  
綱風雲從。龍虎樂舞登鳳凰。珪幣有容秩。綉纓紛煥。  
煌苾芬。旣明誠。彤蠻廻寄蒼。茲焉迪昌運。赤伏臻遐。  
祥徂征。乃自葛義旅。時鷹揚。同德奮熊羆。桓桓先啓。  
行阿衡。重麾鉞。跪觀旂常。海岱仍率職。堪輿希泰。  
康繁祠陋。衰典昭告紀。興王群英聿來助。委珮鏘珩。  
璜多儀。動文彩。列宿開榮光。庸勳忝趨承。賡歌聆頌。  
童宸猷願終。述豁達垂無疆。

曲阜闕里謁廟

鮮組辭鄆郭。驅車循魯坳。前登闕里近。端仰素王靈。  
猗蘭遺芳潔。神檜鬱葱青。時化洽千祀。奎光浮四溟。  
多儀殷廟享。斯文傳壁經。几筵猶設席。容秩儼充庭。  
所念迷途者。空瞻明德馨。困蒙今獲吝。幽悱未遑寧。



靡靡寒水至。塗塗朝露凝。端回馳驅意。夙夜思儀刑。  
洪範祠龍池。禱雨獲應答。隱士劉文正。暨邑中

群彥

齋沐戒徒御。星言趨絳壇。屬茲愆陽序。雩祀罄東丹。  
龍湫育深閔。神物時蜿蟺。馨潔始云薦。靈祈紛可干。  
沛然感敷施。霖霖濟多艱。淅淅在林岫。冥冥被岡巒。  
焦原幸沾濡。庶類同忻懽。鳴鶴集穹室。翔鱗躍紋瀾。  
郊垆悅童耄。庠塾慶衣冠。所協詠歸趣。方希民俗安。  
賡歌誦雲漢。玄化奚能殫。

弔陳思王祠墓在東阿

鄴都雄盛日。英才妙七賢。夫君照乘珠。五色麗且鮮。  
西園倡華藻。東洛賦嬋娟。游鸞翔朝旭。芳藻映碧蓮。  
始協棣華美。寧虞箕豆煎。桐圭空錫社。銀海閉陰泉。  
白楊翳荆榛。狐兔穴其所。喟然蕪山嘆。肯企淮南僊。

秋夜雜興呈涂典籤頴

璿杓運西宇。華月麗中楹。坐知流序易。遙夜秋風生。  
銀漢呈霄景。金堂含夕清。柔條棲湛露。嘉蕙茁幽莖。  
撫迹遂成感。如何君遠征。相思雲陽浦。岌堯限玉京。  
鏡鸞停趙舞。箏鳳歇秦聲。寸心渺何極。搖蕩如懸旌。  
寓官空候郵。雄飛使回不至。



湛露晨未晞。秋華被原隰。征途夙已戒。承命履遐邑。  
桂水寒悠悠。揚帆望不及。川鱗想同泳。羈羽尚云戢。  
維楫垂素期。臨流重於邑。睠然沮溺耦。詎灑楊朱泣。  
惆悵芳菲情。日暮空佇立。

餞區伯寬領歸善邑教

橫塘候秋色。芳藻颯已變。渺渺波上舟。忽如翔風燕。  
琴觴激幽思。籩豆徒有踐。所念同襟者。飄飄各鄉縣。  
章縫協冲素。况復斯文彥。此邦多奇勝。名山蔚葱蒨。  
暄壑栖雲霞。寒松閱霜霰。爾行問津處。沮溺因可見。  
贈錙仁仲昆季還浙東

沉憂自多緒。復此送歸人。昨夜淮南雨。不知芳樹春。  
竭來持別酒。相與慰茲晨。日暮行艫渺。東南瀾越津。

秋夜和黃典籤哲

涂穎

遙夜天宇迥。開軒坐前楹。月華臨水動。涼風滿庭生。  
屢惜玄景至。悟茲塵慮清。踈星明玉闕。委露浥金莖。  
跂予倏將邁。嘉朋紛遠征。微才旅群彥。鳴珮集瑤京。  
文詞資麗澤。笙磬感同聲。豈比江湖客。馳心搖旆旌。

晚歸飲衆芳亭

張羽

晨登群峯首。良遊舒鬱陶。寒衣涉蘿磴。停策眺蘭皋。  
厓端俯城肆。樹杪矚歸濤。江平遠帆駛。天淨群山高。



曠望信多美。喧濁暫能逃。况值芳樽酒。一酌解疲勞。

三江口望京闕

周年赴陵邑。穉景懷京闕。引領鳩鵲觀。言旋桃李月。綠蕪滿芳甸。青山麗佳節。沙氣已含春。柳意方辭雪。征夫雖適止。同心仍阻絕。逃空庶無遺。賞勝聊自悅。吾其和天倪。將從莊令說。

切切重切切贈普仲淵

徐賁

切切重切切。相逢復相別。君行車有輪。我車去無因。千里更萬里。宛轉車輪裏。關山路嶮巖。行速寧行遲。

詠懷二首

黃肅

馬瘦足力短。士貧心志窮。相如豈不偉。滌器難為容。憶昔擅詞賦。左右能生風。黃金資費用。意氣自填膺。迎遭勿復歎。命達皆稱雄。少壯好遊覽。不知中道憂。方茲懷故土。眷此成淹留。圓缺蔽朝暉。玄雲陰以浮。徘徊當求夕。燕婉將焉求。栖鳥翔不息。鳴蛩亦啾啾。人生無定止。卒歲何能休。

神釋

李德

大哉渾淪妙。橐籥自無窮。網緼一已構。界付出至公。靈臺本無物。而我處其中。清虛為我體。昭明為我庸。倏往入無間。忽來歸寂空。既作百骸長。蔚為萬善宗。



母從衆形擾順適與天通

雜詩

人生更代謝闔闢爲之機盛衰無常理生死乃其宜  
始來本自無終往奚足悲擾擾依形立百歲以爲期  
黽勉返吾初俟命復奚疑

孟夏五日感興

春陽舍我去四序無時停鬱鬱當軒柳珎禽時一鳴  
素琴寓我適濁酒陶我情顏鬢雖云改寸心有所憑  
偃仰東窓下聊以寄吾生

種麻

種麻滿東園種花亦盈畝麻生但芘芘華發映戶牖  
容華能幾時零落他人手豈如爲締綌與君同永久  
向來灼灼姿于今復何有

送友回真定

君自邯鄲來復向邯鄲去邯鄲月色好夜照江南樹  
大行多埃坂中有羊腸路往來不憚煩知君爲親故

宿栖雲庵

衆壑忽已曠遠近響清湍山中對僧定踈雨掩柴門  
柳暗猿猱集氣交風露寒攬衣中夜起蘿月在巖端

栖雲庵留詠



石室凝紫烟。空洞懸石乳。陰崖含風泉。終日灑飛雨。  
臨流結精舍。六月不知暑。道人養清虛。適與高僧處。  
垢淨俱已忘。孰為舍與取。諸幻既遠離。白雲日相與。  
何當謝時人。來作塵外侶。

題陶淵明像

淵明節槩士。遠慕羲皇風。榮名奚足道。甘分固其窮。  
得酒即為歡。簞瓢常屢空。朝出山澤游。暮歸衡宇中。  
豪華非所貴。但願歲時豐。秋菊或盈園。栖栖誰與同。  
濁醪共斟酌。日入會田翁。此士不再得。吾生焉所從。

亭亭水上藻

亭亭水上藻。皎皎沼中藕。花落子亦成。色衰心不朽。  
中藏千萬緒。處污恒自守。不學楊白花。隨風入窓牖。

柳塘書舍圖

遠山出白雲。近水明秋色。烟波漫浩浩。日暮歸舟息。  
隱約叢薄間。茅茨倚蒼石。中有柳塘翁。看看似相識。

觀白鷺

河洲雙白鷺。皎皎照清流。所希在鮮食。所願亦易酬。  
朝飛浦溆曠。暮宿林塘幽。寄言採薇客。吾與爾同遊。

雜詩

蘇伯衡

還家信可喜。還家亦可悲。喜全骨肉親。悲與故舊辭。



吳越各異鄉。關河復間之。明日一尊酒。何由共歡持。  
念念不忍別。戚戚臨交岐。童子笑謂我。悲戚亦奚爲。  
自非形與影。安得長相隨。

擬古贈別

郭奎

孟冬霜露降。悴彼荷與蒲。青青蕙蘭芳。采之將焉如。  
贈君夙昔意。聊以慰斯須。絃歌厲清響。置酒岐路隅。  
親戚念遠行。各言勉良圖。常恐不爲樂。日月方其除。  
晨風奮高翼。北林多古榆。臨岐執子手。安得同車驅。  
秋水竟長川。高亭對孤嶼。覽君瑤華篇。徃徃似仙語。

秋日次右司韻

歡遊繼晨夕。追昔念徂暑。揚舲濟東湖。采蘭臨北渚。  
落日散餘霞。輕風度微雨。回瞻城堞表。樓觀襲空宇。  
渺渺帝子洲。衰草亦萋只。鳧鷖相翱翔。漁歌起前渚。  
星霜忽已周。遲留感年序。睇彼東南天。馳思久凝佇。

過皖城弔青陽先生

維舟大江許。攬涕登茲城。哲人不復見。黃鳥悲且鳴。  
高山尚巖巖。梁木何乃傾。忽逢舊耆老。向我宣忠貞。  
明公夙有誓。慷慨存遺銘。死即爲厲鬼。生當殄長鯨。  
應敵旣神武。百戰何縱橫。精誠貫白日。天子無援兵。  
歲久矢石竭。捐軀全令名。



九日偶成

良辰惜難再。秋序倏已殫。登高啓飛閣。望遠俯層巒。寒菊正盈把。濁醪方具歡。微此一日宴。客懷殊可歎。

次錢子貞蘇門感懷

燕支木葉落。盧龍秋色來。空閨有思婦。清夜悲且哀。錦書為君寄。寶鏡待君開。膏沐不復容。綠髮栖浮埃。團團皎月輝。照彼單于臺。馳心在萬里。出戶聊裴回。

贈別

蟋蟀悲歲暮。起視夜何其。淒淒霜露降。蕙草颯以衰。薄言子當往。軒車發行遲。聊因一盃酒。慰此平生知。

采采西澗蘋。悠悠懷我思。我思詎能已。君心諒不違。

夜坐

顧觀

嘖嘖候蛩鳴。離離寒鴈過。擊柝警荒戍。然燈照孤坐。風從林外來。月向窓前墮。悲歌清夜發。激烈誰其和。

寄張允載兼柬項思復

宋璲

憶昔到京畿。與子寓官廨。一見即相驩。不翅舊交快。維時困道塗。驅車久行邁。忽逢弛擔初。欣若身脫械。握手坐氍毹。軟語慰疲倦。情投比黏膠。意愜甚搔疥。煩君數過余。滯下喜方瘥。三人互談喙。何殊合糾繆。驂鑣出游衍。古蹟探其恠。路入青蓮宮。駐足聽梵唄。



薄晚始旋邸。傾倒形忘察。周詳論書譜。從容說詩冰。  
 允習尚浮華。遺音日已壞。作者固繁夥。咸韶混夷鞅。  
 瀾倒并波隨。疇能拯危敗。顧余樗散材。頻年處卑隘。  
 枘鑿垂方圓。甘遭世倒賣。人將競嘲譏。子乃敦教誡。  
 苦言加箴規。默默使心解。酒酣示新篇。辭源極滂湃。  
 却類任公子。投竿下群鯨。應同藝嘉禾。瘳治絕穉穉。  
 讀之神駭驚。秋蛩罷嘶唱。政圖藉薰陶。別還隔遙界。  
 欲叩寢食安。但復占爻卦。浦汭守衡茅。無從豁矇曠。  
 譬諸鐵在爐。伊誰鼓風鞴。况乃患沉痾。軀命猶織芥。  
 侵尋閱暑寒。孱弱乏剛夬。精神盡凋耗。面目多腫膾。

布衾暖閣眠。藥裹晴簷曬。年來獲告瘳。書齋仍掃灑。  
 猿鶴亦爭慶。似索烟霞債。綴賦詠雕蟲。攻篆學垂薤。  
 有時看飛泉。四山寂無天。思取古遺經。一覽適多嘷。  
 蘭膏繼日晷。矻矻警昏憒。視已常欲然。進業慙質麤。  
 志須成絲系。未能脫管蒯。篤信宴安中。懷毒劇蜂蠹。  
 蚤暮自深省。此語諒非衛。近聞子亦歸。親朋樂情話。  
 千里感貽書。殷勤馳一介。而翁幸康強。愧缺床下拜。  
 執簡立臺端。百壬不敢噫。道遠竟莫前。動若飛翮。  
 歲月無停軌。季秋倏已屆。籬菊傍雲肥。江山日如畫。  
 軒車幾時來。夜雨一燈掛。明德正可崇。相期各云勵。



守張國錄孟兼

吳植

昔別意何長。重來歲華改。沉憂誰與娛。懷人邈江海。寒衣涉汀洲。秋風被蘭茝。日夕零露繁。芳馨為誰采。嘉會諒難并。良辰詎容待。思君如明月。夜夜望光彩。

遣懷

劉琰

綠蒲水中浮。白鶴雲間飛。霄漢有脩程。焉能顧卑微。浩蕩展羽翰。崑丘以為期。鵬鷲趨下風。尉羅絕張施。倏忽萬里餘。摧頽不知歸。空林有故巢。繁霜日霏霏。孤雌哺黃口。啁晰將疇依。豈如戲蘋荇。雙栖在漣漪。

贈別鄭同父三首

劉崧

明月何皎皎。流輝青天中。美人寒碧幌。沈若晴烟空。露下白玉闌。烏啼金井桐。永懷君子心。寤寐向秋風。道遠而別多。煩憂鬱冲冲。焉知南園下。昔日桃花紅。君看舊行跡。一一生蒿蓬。

宜宜陽靈洞。中有綠髮仙。世人不可見。出入乘紫烟。時來拾瑤草。獨立青山前。粲然發皓齒。玉井開紅蓮。我欲往從之。茲事今千年。似聞九州外。碧海廻青天。願携兩玉笛。吹向崑崙巔。崑崙九千仞。浩蕩不可期。九州行無窮。會有相逢時。執手不忍別。贈子雙瓊枝。交道愧苟合。素心諒難知。



油油山上雲。冉冉無定姿。松栢生澗壑。貞性終不移。  
天寒白日莫。秋風動江蘿。悵然道路遠。何以慰所思。  
馬鳴城北門。長揖從此辭。但知行者樂。詎知留者悲。

送孫景賢歸江東

客有敬亭思。春愁何渺然。謝公墩上月。已照江西船。  
船頭花亂飛。醞酒發鳴鼓。四顧不成權。悲歌淚如雨。  
壯遊南海上。曾着從事衫。驄馬青連錢。馳突開曉巖。  
南歸阻艱難。寄食贛江側。多謝尚書公。看客好顏色。  
高筵列綺饌。賓客如流雲。舞劍萬人却。談兵四座聞。  
年華隨流水。五見楊柳綠。夜夜夢故山。浮雲滿巖曲。

茲行未可住。卻望江東還。人散井邑空。鳥啼烟樹間。  
殷勤候高堂。次第訪隣里。山栗與木瓜。離離照烟紫。  
放船弄明月。躡屐凌翠微。春風久相待。吹老薜蘿衣。  
南平二月暮。惆悵忽成別。把臂共論心。知君有奇節。  
東遊我所願。遠作秋風期。却携采石酒。高味敬亭詩。

感秋

林鴻

撫劍中夜起。氣候何凄清。天高白露下。北斗當前楹。  
嗷嗷雙飛鴻。隨陽亦宵征。微禽爾何知。寒暑搜其情。  
始知玩物化。中復念吾生。三十志有立。一經尚無成。  
緬懷古哲人。信與天運并。道在無終始。時來暫衰榮。



感嘆不能寐。延首東方明。

江閣秋雲圖

山容初斂。夕雲氣已歸壑。何以散冲襟。孤琴坐江閣。美人期不來。天寒楓葉落。

答黃逸人

大道如砥平。我車不方軌。明時世景清。夫子乃蓬累。有客天上來。爲說黃金臺。所市旣駿骨。所羈乃龍媒。五月上武陽。炎風焚大荒。豈伊道路難。欲往河無梁。華門逢君子。酣歌日中市。披髮行且吟。時人盡驚異。旣知歸日落。欲往秋風作。誰同審子嘆。且効榮叟樂。

離別遠將歸。涼風吹布衣。南飛有鴻鴈。母使信音稀。

賦秦淮送宋仲珩

朱孟辯

春漲曉沄沄。空明澹孤嶼。中流送行舟。綠波渺南浦。鷗從青鏡下。人立滄溟語。素縠漾涼颿。圓紋散踈雨。桃葉懷舊題。後庭歌吊古。因之寄離情。前洲采芳杜。

長門宮

趙介

翠華朝望迥。長門夕思孤。螢流金殿暗。露下玉階蕪。昔作鳴陽鳳。今爲繞樹烏。愁顏空似玉。咳唾不成珠。寶鏡塵將滅。羅裳色漸枯。泪將寒漏水。夜夜滴空壺。

步虛詞



采采清露英皎潔玉不知元和合真一飲之極甘腴  
自然生羽翼何用登雲車迢迢大漢上瓊臺曠清虛  
永從衆仙去天風搖佩琚

贈方希直赴漢中教授

鄭居貞

翩翩紫鳳雛羽翮備五彩徘徊千仞翔餘音散江海  
於焉覽德輝濟濟鏘環珮天門何差峩群仙久相待  
晨沐晞朝陽夜息飲沆瀣如何復西飛去去秦關外  
岐山諒匪遙啄食良自愛終當巢阿閣庶以鳴昭代

詠秋風

黃玄

目眇洞庭波辭雄楚江宴帝子正愁予羈臣髮先變

冷然閭闔生颯爾江潭通隨陽驚寒鴈附熱駘巢燕  
縈帶步雲飛飄拂歌雪轉衣露戒履冰絃霜愁淚霰  
蔡女掩悲笳班姬襲團扇淒涼如一宵偏向長門殿

霽月

許繼

碧霄靜風露纖翳久已滅清輝滿瑤基素影流銀闕  
蒼茫九萬里皓若冰玉潔天步夜迢迢但見踈星列  
虛懷自無念對此方洞徹

客建上將歸山中留別劉典籤 藍智

在山願遠游出山願早歸羈懷苦無棕芳序倏已非  
瀾瀾江海流紛紛花絮飛清霜變玄鬢游塵化緇衣



日... 卷... 三  
難危迹易垂。少壯心轉違。雲鴻每獨往。梁燕當疇依。  
野樹帶殘雨。荒臺澹斜暉。浩歌泳水曲。空拂黃金徽。

擬古

許廷慎

松柏在喬嶽。歲晏恒蒼蒼。何意繁華子。植之岐路傍。  
生理既不遂。牛羊復來傷。風飄旦夕起。忽焉同枯葉。  
靈鳥日暮歸。延頸悲且翔。摧殘不足惜。誰克君棟梁。

自武林至姑蘇三首

朝辭武林城。夕弄吳江水。大風引輕帆。一日三百里。  
浩渺駕洪濤。飄飄類仙舉。黃鵠如可乘。吾尋羨門子。  
捨舟飲吳市。逍遙望村墟。湖水浸城綠。人家半樓居。

帆檣隘津許。利奪爭馳驅。多材適為累。有酒君當沽。  
喧喧谷中鳥。每被樊籠拘。鳴聲縱有得。羽翮安可舒。  
不見崑丘鳳。乘雲在天衢。千秋始一下。放意何自如。

擬古

朱昇

霜露悴百草。蟋蟀鳴聲悲。朔風寒以厲。良人久無衣。  
時服委深篋。路遠難致之。仰視投林翮。還依故巢飛。  
物性有如此。念君歸無期。矧當苦寒節。坐傷音問違。

會慶堂

唐愚士

飄飄山上雲。乃在谷中藏。風吹萬里去。何當還舊鄉。  
阿翁昔居鄉。黑髮在高堂。手栽堂前樹。日夕望陰涼。



不意偶飄逐。雲路浩茫茫。阿翁今來歸。樹已如人長。  
 閭里相慶賀。出入有輝光。東畝種菽粟。西畝種稻粱。  
 南畝種菅麻。北畝種桑棗。收稻持作飯。繅絲持作裳。  
 上以輸井稅。下以奉蒸嘗。阿翁有兩兒。兩兒復有郎。  
 蟄蟄宅中居。婉婉有義方。阿翁升堂坐。子孫列兩旁。  
 阿翁出門去。板輿相扶將。日入始言歸。侍婢獻羹湯。  
 人生貴慶樂。此樂殊未央。傳與翁後人。守之慎勿忘。

閒居感懷六首

方孝孺

鳴鳩知天雨。乾鵲知天風。蟋蟀最無知。亦悲年運窮。  
 云何當世士。憤憤温飽中。疾疢如波濤。浮沉淒所終。

鳳隨天風下。暮息梧桐枝。群鳥得腐鼠。笑汝長苦飢。  
 舉頭望八荒。默與千秋期。一飽亮易得。所存終不移。  
 乘時功易立。處下事少成。君看蕭曹材。豈若魯諸生。  
 賢豪志大業。舉措流俗驚。循循刀筆間。固足為公卿。  
 賢有四海志。家無一金貲。言高力不足。舉世皆笑之。  
 不如豪俠子。錢刀散孤嫠。閭閻稱行義。莽莽名聲垂。  
 我非今世人。空懷今世憂。所憂諒無他。慨想禹九州。  
 商君以為秦。周公以為周。哀哉萬年後。誰為斯民謀。  
 池魚不知海。越鳥不知燕。蚯蚓霸一穴。神龍輕九天。  
 小大萬相殊。豈惟物性然。君子勿嘆息。彼誠可哀憐。



次鄭好義見貽韻二首

赤驥困皂櫪○垂頭避駑駘○王良振長轡○蹴踏風雲開○  
古來功名際何代○無竒才○當其未遇時○誰免蒙塵埃○  
丈夫亮有命○勿使心顏頹○  
山中一尊酒○慰此離別腸○清夜步廣庭○大星吐寒芒○  
向來負竒氣○舉目空四方○栖遲盛年至○留滯天南荒○  
君看升帝閑○不必真乘黃○

送友賦白鷺洲

釋來復

大江何迢迢○中有白鷺洲○二水西北來○洪波浩無休○  
天塹固云險○今乃爲安流○深浦汎鷓鴣○芳樹鳴鞦韆○

念子久留曷○嘯歌此遨遊○酌酒佳麗亭○題詩鳳凰丘○  
太平愜良會○期當慎所脩○方舟忽言邁○折柳青沙頭○  
仰視三山雲○送子心悠悠○

山居雜興

拾菌東山阿○採蒲南澗曲○自知生事微○頗覺幽興熟○  
緬懷同心人○白雲在空谷○欲寄長相思○迢迢楚江綠○

夜坐

孤榻坐清夜○端居塵事屏○微風動林杪○皓月出松頂○  
觀妙澹忘言○超然心自領○寥寥六窓虛○鏡燈落寒影○

題山水圖

釋宗泐



辭山始兼旬見山心最喜披圖忽悄然舊遊宛相似  
 微茫敬亭雲迢遞賞溪水猿啼樹蒼蒼漚泛波靡靡  
 岳阿叢桂生茅屋無人理何為滯江城眊眊黃塵起

暢情  
 鄧羽

花無長在樹人無長在世有花須當賞有酒須當醉  
 秋霜上鬢來春風吹不去

明音類選卷之一

明音類選卷之二

五言古詩

北上行

胡虛白

食蜜不知苦衣褐不知寒今晨出門去始知行路難  
 驚飈吹斷蓬沙磧何漫漫羸馬縮如蠅霜花大於錢  
 夜涉黃河凍舟行不得前君腸轆轤轉我腸車輪盤  
 王事有嚴程去去勿憚煩彎弧落旄頭飛箭定天山  
 會賦鏡歌曲論功萬里還

車遥遥

解縉

車輪何遥遥西上長安道不見車上塵空悲道傍草



君行日已遠恩愛難自保憂來當何如一夕夢顛倒  
豈無中山酒一浣我懷抱但恐三春花顏色不再好  
車聲何鄰鄰風吹馬蹄塵願隨馬蹄塵飛逐君車輪

漢江夜泛

楊士奇

汎舟入玄夜奄忽越江干圓景頽西林列宿粲以繁  
凝霜飛水裔回飈蕩微瀾孤鴻從北來哀鳴出雲間  
時遷物屢變游子殊未還短褐不掩胷歲暮多苦寒  
悠悠念行邁慊慊懷所歡豈不固時命苦辛誠獨難  
感彼式微詩喟然興長歎

雜詩二首贈陸伯湯

中夜不能寐攬衣步前楹圓靈肅清穆涼風颯以興  
秋蟲亦何悲流響於階庭徘徊感節變絲絲幽思生  
四時擲人去忽如流電驚立身庶及時黽勉苦無成  
竊愁盛年邁將與秋草并念之不得言俛默傷我情  
南國有佳人皎皎懷芬芳被服紈與綺五色何煌煌  
光儀希世有音響流四方我懷徃從之晨征越河梁  
嘉遇誠獨難懽愛兩相當願得常携手終歲不相忘

送王胡二生歸西昌

卞和得荆璞獻之以爲珍當時不見信棄置同凡珉  
任公釣東海終歲無寸鱗一朝乃大獲厭足浙河濱



丈夫遇有時，屈伸理相因。黃金築高臺，青雲登要津。  
古來公卿貴，皆出畎畝民。兩生吾鄉彥，讀書非隱淪。  
白日辭都門，歸卧烟蘿春。努力崇進脩，人生豈長貧。

秋夜

管訥

不寐耿長夜，攬衣徒歔歔。陰虫吟近砌，涼颼動踈幃。  
素抱殊未釋，清懽念多違。豈惟南飛鵲，茲夕無所依。

寫懷

朝迴憇公館，殘陽坐來暝。踈雨過高林，華月出東嶺。  
流光晨復晡，朱顏豈吾永。故園歸何時，悠然發深省。  
和吳教授晚泊大信阻風

樓船遡流上，高帆阻長風。大江浩無際，一氣何鴻濛。  
回望天門山，峩峩相長雄。洪濤走其下，屹立西與東。  
不有浮海歎，豈無濟川功。大鵬度寥廓，斥鷃守卑聳。  
物理固有定，世事徒匆匆。張燈啓華筵，一笑杯酒中。

秋懷三首

胡儼

大火已西下，太白橫蒼蒼。瑤塔泣涼露，玉簾含秋霜。  
冥鴻集華渚，巢燕悲畫梁。物理有代謝，人心徒慨慷。  
何如廣成子，憂樂永相忘。  
草虫階下鳴，夜久猶未歇。掩卷坐閭窻，秋聲振林樾。  
人生知幾何，憂來不可輟。風吹浮雲開，送我半窓月。



逍遙步前庭。孤螢自明滅。  
落葉走空階。涼飈度脩竹。疎星澹長河。白露下庭綠。  
遊子行未歸。清砧動華屋。感此悲歲年。何由寄遐躡。  
丹丘倘有期。舉手招黃鵠。

山谷讀書臺

昔賢去已遠。荒臺遺高丘。躋攀陟其巔。坐見江漢流。  
簡策亦何有。荆榛亦何稠。清商振林薄。灑氣凌高秋。  
黃葉墜我前。寒蟬鳴啾啾。感茲時物變。川塗行未休。  
俛仰宇宙間。吾道良悠悠。

題西陵送別圖送姚進士

劉績

悠悠復悠悠。風吹江上舟。今朝天色好。送客西陵頭。  
西陵在何許。暮巖春郊樹。搔首望行人。迢迢上京路。  
京路一千程。官梅照眼明。春風濃似酒。難浣別離情。  
別離餘幾日。佇得君消息。折取杏園花。慰我長相憶。  
相憶夢相仍。高樓只自登。春潮知我意。日夜向西陵。

百花洲

姚廣孝

水艷接橫塘。花多礙舟路。波紅晴漾日。沙白寒栖鷺。  
綠汀漁網集。隔浦菱歌度。不見昔遊人。風煙自朝暮。

贈別

胡廣

驅車出部門。迢迢欲何之。駕言向關隴。指日西北馳。



朝登黃河壩暮投洛與伊歷覽有古迹憑高多曠辭  
由來賢達人壯志在四陸焉能事局促徒負蓬萊爲  
念子本超宕雅懷良不羈所希在前轍離別何足悲

題王侍講山水

楊榮

木落霜氣清。秋山淨如洗。天空萬籟寂。地迥孤雲起。  
深溪湛寒綠。對此清心耳。安得掃蒼苔。橫琴寫流水。

雜詩

黃淮

蒿蓬相因依。飄飄逐風起。風力有時息。零落在泥滓。  
蘭蕙幽且清。揚輝被芳沚。白露凝爲霜。華葉亦披靡。  
蒿蓬何足歎。慨此蕙與蘭。蘭蘭衰有餘。馥猶足奉君歡。

擬古三首

王誼

妾家東城隅。高門瞰中逵。玲瓏結綺䟽。參差雕玉題。  
旭日麗芳藻。光風泛羅帷。春花媚妍質。徘徊處中閨。  
調絃拂纖指。哀響流輕颺。聲悲節自促。曲度雲行遲。  
妍情託琴瑟。中曲正逶迤。悵望知音遠。華容非故時。  
明月生海底。輝光燭重淵。豈特照乘車。價直黃金千。  
自我得此物。藏之已多年。豈不遺所思。按劍無由前。  
逝矣鄒陽子。寂寞甘棄捐。

獻玉無良媒。漂淪寡懽豫。壯齡已非昔。馳暉日西鶩。  
嘉木無榮柯。脩條亦成故。一感式微吟。吁嗟在中路。



關山別意

蓮葉未青時沙頭話別離舟行期早發日晏未曾移  
遲迴一何久念我平生友莫問去程遙且盡杯中酒  
君今往何處萬里長城路路遠人迹稀黃雲黯朝莫  
隴阪歷歎傾雙輪不暫停時聞嗚咽水流作斷腸聲  
驅車無少息又度長蘆北八月鴈南飛天山草俱白  
橫笛在高樓關山月裏愁離人聽此曲白盡少年頭

題陽關送別圖

鄭嘉

漠漠楊柳花青青楊柳樹帶花折長條將送行人去  
灞陵勿淹留明日發沙洲沙洲連塞路望望使人愁  
願推雙車輪推過壽昌縣壽昌何蔚蔚邊城如眼見  
別曲歌且停春醪香更清一杯歌一曲曲盡兩含情  
含情豈無語別離心更苦懊恨別離多懽娛能幾許  
萬水復千山人去幾時還誰言功名好儂道不如閒

感寓五首

王侁

秋氣肅萬物嚴霜下空庭不惜百草晚惜此蘭蕙傾  
祥麟一朝羈尼父為涕零大運固莫測聖哲那能營  
容成安在哉遠跡良冥冥  
闕居嬰世媒局束無安步石火流狂飈憂來鬢成素  
誓言濯吾纓釋此出門去臨流弄滄浪并立引遐顧



仰羨雙飛鴻，蕭蕭在雲路。  
直木忌先伐，甘井忌先竭。  
何爲抱區區，昭如揭日月。  
至人善閉關，埋照慎不發。  
入獸不亂群，虛舟任超越。  
襄壑迷帝軒，汾陽枉堯轍。  
栖心玄靈臺，可與人世絕。  
天天園中桃，灼灼映綺窓。  
窓中有織婦，顏色如青陽。  
三年弄機杼，七襄成報章。  
成章欲何爲，願以充君裳。  
但恐不見察，徘徊空感傷。  
照影莫唾井，種葵莫傷根。  
葵不生唾井，隳明神樂生。  
北去趙由余，西霸秦壯士。  
感知已鄙人，惠私恩止止。  
且勿哀千古黃金墓。

宣德丙午扈駕巡邊途中感興 楊溥

高車度重關，重關路漫漫。  
兩廂旣充軻，四牡何盤桓。  
翹首望前軌，迢迢不可攀。  
任重難爲力，臨岐發長歎。

即事

鄒緝

月上碧天高，夜涼清露重。  
獨起推蓬看，風生寒波動。  
兩岸蘆聲急，一川煙景微。  
忽聞棹歌響，驚起白鷗飛。  
蕭蕭岸葦黃，瀲瀲江波白。  
靜夜不成眠，起坐看明月。

送人還廬陵

吳溥

來時梅始華，歸時梅已黃。  
送別臨江頭，別懷江水長。  
君家廬陵西，我家臨汝湄。  
平居相借問，爲寄長相思。



題金華宗原常雙溪洗藥圖

洗藥臨溪頭。水流溪尾香。居人飲溪水。百年躋壽康。  
石路曲盤蛇。山花如錦黃。日暮携藥歸。香風滿衣裳。

寄樂介貞素二友

故人久不見。新夏倏已臨。林雨留宿潤。庭槐匝繁陰。  
昨夜夢故鄉。歡然盍朋簪。青燈共酌酢。耿耿論夙心。  
覺來遠相憶。愁嘆日已深。何由命吾駕。千里遙相尋。  
冬日扈從還南京。隨駕出麗正門馬上作。

曾祭

朝隨六龍駕。遠別黃金臺。萬乘出都門。旭日淨浮埃。

翠華正飛揚。玉輦從天回。羽林羅猛士。夾道馳雲雷。  
回首望玉京城闕。何壯哉。海水向東流。西山鬱崔嵬。  
上有五色雲。垂輝映蓬萊。壯遊愜周覽。欲去仍遲徊。  
策馬天仗間。宿昔長追陪。古來詞翰臣。豈但鄒與枚。  
至今百世下。聲譽揚九垓。

三月二日舟次開河同胡祭酒鄒侍講登岸散  
步長林曠野中。桑麻蓊然因。至田家各賦一詩  
而去。

芳晨藹新霽。弭楫長河曲。睠茲丘園趣。褰裳涉平陸。  
郊原渺空曠。佇望舒遠目。村中夜來雨。土脉高且沃。



菲廬鷄犬靜日出煙樹綠牛羊散平野隔水見樵牧  
麥深雉初雊桑桑蠶已浴老翁多歡顏生事亦云足  
偶茲一留憇幽境愜所欲僕夫戒前征迤邐出林麓  
緬想塵外踪於焉恣遊矚

擬影贈形

李昌祺

大塊生萬彙繫人最爲靈云胡浪自苦馳驚終靡寧  
化機有恒運迅速弗暫停適見方紅顏鬢髮忽已星  
人身非金石終當歸沉寘不如學神仙服石煉爾形  
君我兩無壞永共天地齡願君取吾語日進參與苓

形答影

有形斯有影物理固其常我行爾必偕我息爾乃藏  
豈但相依附實此同存亡學仙非無術却老亦有方  
古稱彭聃輩其壽邈難量於今竟安在孰是長生鄉  
多君爲余勸茲道終杳茫參苓且當止莫若啣盃觴

題雙燕圖寄表弟陳安行

君家吟溪北我家郡城西君家梁間燕我家梁間棲  
我從出鎮來寒暑已三變不見故鄉春惟見故鄉燕  
挈家古城邊寓家汴河湄燕識主人心相隨不相離  
念君千里隔見君幾時得欲令燕啣書飛歸到君側  
君能弗吾棄爲理白雲莊願言共君老看燕雙飛翔



擬劉公幹

王洪

園林多佳木。秀氣何蒼蒼。石梁冠崇阿。綠水流芳塘。  
行樂在良夜。飛蓋復翱翔。涼風振華纓。明月揚其光。  
清池散芙蓉。秋蘭一何芳。君侯壯思發。逸藻凌風揚。  
小臣信愚劣。狂歌安所詳。

擬陶彭澤

我家南山下。前有嘉樹林。好鳥鳴其顛。涼風吹衣襟。  
沉此尊中酒。撫我膝上琴。禾黍亦以繁。桑麻藹餘陰。  
知此良易足。勞生非所任。

游瑯邪開化寺二首

陳璉

環滁皆名山。瑯琊擅幽勝。雲霞紛卷舒。泉石相交映。  
維時春載陽。日出天宇靜。禪宮凌紫霄。琅琅度鍾磬。  
逍遙者誰子。抱琴候蘿逕。相逢共忘言。頗領此時興。  
峩峩瑯邪山。拔地幾千丈。坤靈毓神秀。景態日萬狀。  
金碧粲晴巒。芙蓉開疊嶂。于時喜躋攀。倏至飛鳥上。  
天姥如可晞。匡廬遙相望。長歌招安期。臨風復惆悵。

擬古二首

馳車鮮安旌。風林無定枝。自愧雲萍蹤。歲月久睽違。  
念我親與友。各在天一涯。音容兩契濶。悲懽何由知。  
倦鳥戀舊林。遊魚思故池。憂來翻百端。耿耿當告誰。



倚劍登高臺。流盼青雲端。天地自高厚。節序如循環。  
山川空歷歷。歲月去不還。古人有遺迹。荒涼萊草間。  
臨風謾吊古。惻愴空長嘆。

六月五日致齋龍潭精舍

靈湫湛泓渟。神宮極虛敞。下有龍所棲。雲氣日來往。  
踈林過新雨。臺榭倏清爽。山色晴更幽。泉聲靜逾響。  
徘徊縱良覲。足愜平生想。安得常此居。坐看玉芝長。

題畫

周忱

虛齋臨絕壁。精廬抗踈峯。寒翠藹巾舄。石瀨清房櫳。  
雲歸樹色暝。鳥度潭影空。獨坐者誰子。彷彿商山翁。

釣艇自來去。苔磯絕行蹤。歌殘紫芝曲。西林聞暮鍾。

艷歌行

王直

翩翩春歸鴈。秋至復來翔。如何遠遊子。兄弟各異方。  
山川何迢迢。參辰夜相望。寒風日以厲。誰與縫衣裳。  
衣裳無與縫。零露結為霜。空林悄無人。但見明月光。  
徘徊不能寐。徙倚臨中堂。睠彼南飛翼。故鄉安可忘。

夜坐

初夏節始暄。單居夜猶永。城頭吹角罷。陌上行人靜。  
簾風度涼氣。窓月散清景。懷抱一欣然。觀書發深省。  
發儀真道中登岸延覽因憶前行



舟行苦遑迴。登岸曠心日。天清浮雲卷。野秀新雨足。  
澶漫衆流會。杳靄群山綠。風暄花意亂。日暖鶯聲續。  
却憶同心人。無由踵前躅。

雜詩

王英

庭中多嘉木。枝葉相蔽虧。上有雙飛鳥。朝出暮還歸。  
和鳴相顧盼。乳哺得所依。如何遠遊子。泛泛東復西。  
昨來京洛間。今赴北海涯。迢迢歷崇坂。車輪行且遲。  
垂堂古所戒。窳木悲路岐。私懷諒勿念。但悲歲月馳。  
顧此三嘆息。良會在何時。

扈從北征沙漠有作

秣馬居庸西。振轡榆林北。戎車何鱗鱗。行者不遑息。  
陰風盪四野。飛鳥皆歛翼。但覺威令嚴。先聲震戎狄。  
男兒當此時。孰不思報國。彎弓佩長刀。誓欲剪強敵。  
豈知聖明君。用武亦尚德。方圖舉吊伐。豈但專斬馘。

詠竇滔妻七首

李時勉

深閨有思婦。慘悽亦何爲。容華不自惜。獨理流黃機。  
昔者成匹帛。多裁遊子衣。衣新忽變故。恩愛從此衰。  
以茲慙懃意。翻作長恨辭。

蘭茝被幽畹。桃李媚春陽。新昏結繡縵。肇袷散芬芳。



棄置父母歡婉婉君子傍白日麗鮮服朗月澄清光  
矢心以自固願為鴛與鴦

西墅起高臺迢遞憑雲岑中有嬌艷女當牕弄清音  
音聲蕩以肆居然變同心魚目奪明月讒口銷黃金  
不見冀中饑惻愴屢屢吟

高車擁旌旆輝映漢江曲富貴一朝異窈窕辭別屋  
含笑落日遲浩歌湘水綠山川不可踰安得遙相逐  
佳麗誠足珍涼薄難見錄

滔滔江漢流到海不復返千里得所歸中復厭婉婉  
在昔枉綏授駕言不辭遠誰知三周復却道羊場坂

芬芳空自持白日忽以晚

昧旦不能寐攬衣起徬徨織縑與織素誰復知短長  
只尺組幽思迴還遂成章緘之戒僮僕欲以寄遠方  
宛轉達苦志敢期昔所亢

別久意恒親覽辭念愈結巾車適千里倏忽已超越  
鳴琴諧古調恩愛感離闊夙心諒所貞慙歎對明月  
睠言固終始皓首以相悅

耕樂

守拙不用世獨分山中居原田繞林麓自能把犁鋤  
春耕秋始穫食力寧厭劬種粟南陌上放犢東城隅



蚕絲既有望。廩庾亦有儲。上以輸官稅。下以給妻孥。俯仰幸無匱。取適不願餘。鷄豚滿眼前。酒熟焉用沽。興至時一酌。隣舍更相呼。醉來忘日夕。擊壤歌唐虞。

澹齋

金誠

端居探元化。因物窮至情。智者取其實。薄俗徒徇名。玄酒本忘味。大音亦希聲。冲和養天性。得之良足矜。繁華豈不貴。倏忽秋露零。寄心向冥漠。永以全堅貞。

夏夜步月

于謙

明月入我戶。清風吹我衣。散步下瑤階。仰看星斗輝。萬籟寂不聞。群動咸息機。嘯歌振林藪。鳥雀爭分飛。

興盡却歸來。此意知者稀。

題山水圖二首

蕭鑑

青山何岩堯。下有嘉樹林。高亭書閒敞。窓戶含層陰。前村夜來雨。石瀨張素琴。好鳥鳴簷間。始知春意深。迥無外物累。嘿處抱冲襟。對此案上書。悠悠千載心。安得謝塵羈。扁舟諧遠尋。

身已與世遠。超然景方寂。嘉樹敷層陰。芳苔間行跡。飛淙如練懸。斷崖若天闢。亭亭山上雲。齒齒溪中石。豈無同心人。高談共晨夕。簷虛嵐濕衣。牕迥風生席。雅趣良足耽。營營竟何益。



樂隱為尹克俊賦

行愛溪中水。坐愛溪上山。當貴非所願。悠然心自閑。  
地偏輪鞅稀。蓬門晝常關。清風天外來。入我窓牖間。  
豈無一尊酒。可以銷憂顏。葉落驚秋徂。鳥啼知春還。  
既忘是與非。寧復虞險艱。雅志固如此。高踪安可攀。  
宿信陽慈氏寺有懷趙侍御 薛瑄  
山寺月皎皎。流光入簾帷。神清不成寐。起視夜何其。  
天漢漸回轉。北斗亦西移。庭草滋繁露。林竹生涼颼。  
撫景念良友。渺在天一涯。冉冉易寒暑。悠悠隔山陂。  
豈無他人好。中情詎能知。所願得懽晤。以慰平生思。

湘江舟中

湛湛湘水綠。夾岸藂篁多。挽舟逆水上。南風起微波。  
嘉此晴霽景。逍遙玩江沱。沙渚曠緬邈。雲岫紛嵯峨。  
遠目為舒暢。客意將如何。濯纓吾所愛。聊為扣舷歌。

期友人金河橋上納涼不遇

張和

涼月鑑廣津。微風集高樹。翻翻栖鳥驚。杳杳流螢度。  
蕭條旅中懷。悵望橋東路。有約君不來。無言獨歸去。  
送劉文羽赴京兼柬倪學士克讓并問訊敬之

弟

端居感流序。幽懷鬱難裁。况我同心人。駕言適金臺。



援琴鼓別鶴，悽然不能諧。願言挹海水，助我臨岐杯。  
臨岐一杯酒，爲君歌遠遊。人生若流萍，聚散焉能謀。  
落日照大江，長風吹去舟。江花與江水，離恨同悠悠。  
悠悠桐江波，曖曖秣陵樹。之子有遠役，孤帆雨中度。  
佇立江南舟，悵望江北路。恨乏雙飛翰，翻然遂君去。  
去去踐長道，戚戚辭故鄉。故鄉豈不樂，志在觀國光。  
曩無東封書，袖有濟世方。良才貴適用，期爾棟明堂。  
明堂中天開，英傑駿奔走。吾家有弱弟，忝列縉紳後。  
三年不同衾，千里各翹首。君行倘相覲，借問無恙否。  
弱弟固所念，故人那可忘。故人今何如，染翰侍君王。

晨趨黃金陛，暮宿白玉堂。悵望不可即，令人熱中腸。

登泰山二首

旋旆自京闕，肩輿登泰山。仰睇玉女窗，俯闕花馬灣。  
石屏何穹窿，日觀青冥間。道逢羽衣叟，翻然古容顏。  
空歌碧落章，飛行度天關。稽首願相從，雲輶逝難扳。  
凡骨未能羽，日暮空來還。

昔聞泰山高，今上拱北臺。剛焱振六合，曠望無氛埃。  
日觀一峯立，天門兩涯開。瀑流注空谷，響轉萬壑雷。  
似聆笙鶴音，縹緲雲中來。羽節分上下，長烟共徘徊。  
飈車杳難接，自愧非仙材。



悼高處士宗浙

張楷

生別尚戚戚死別當奈何假彼賢達人奄忽歸山阿  
體魄雖云化義名終弗磨悠悠歲月深神馭不復過  
淒風起白楊寒雲翳蓬科一感雍門言千載重悲歌

宮詞

劉儼

霜月照簾櫳開簾獨凝佇玉闌花斂房金井桐垂乳  
風傳百和香羊車往何許嘿嘿整雲鬟鴉啼俄向曙

步虛詞二首

李孟昭

龍漢開先天三洞垂赤文六角耀芒采萬劫爲道根  
紀之青瑤冊封以玉檢溫深藏丹元府冲華蘊靈芬

一朝啓神祕悟入衆妙門超然謝凡鞅皈命玄中尊

浩浩無色祖渺渺劫仞阿帝青凝玄梵碧落浮空歌

蕭臺鬱中峙萬氣森彌羅九陽結菱粲三秀粲停華

靈風散芬藹玉虛蒸太龢神光朗寰宇永世消陰魔

聽秋軒爲高處士道坦賦

夏寅

夜窗展卷罷涼飈倏然生秋隨萬籟起流音入冥冥  
乍沉猶淅瀝稍急還崩騰落葉助餘響蕭蕭徧林堦  
山人方習靜了然心觀清喧寂兩何有皓月當空明

感寓

童軒

周穆御八駿漢武求三山所欲在長生豈憚道里艱



瑶池觴白雲。金盤脣神丹。刀圭卒難遇。龍去不復還。  
千秋陵上樹。落日悲風酸。

田家雜興

步屨出東廓。南風溪午時。偶來松樹下。佇立澹忘疲。  
野老見我至。情親語依依。桑桑蚕已浴。麥秀雉初飛。  
俯仰穹屋間。逍遙詠而歸。寄謝夸毘子。膠膠徒爾爲。

池上夜坐

池上微雨收。涼月吐空谷。蕭蕭敗垣柳。踈影覆我屋。  
草深蛤爭鳴。荷折鷺驚宿。偶此遂閑情。居然忘寵辱。  
擬陶

掩書坐前楹。獨對一尊酒。春風吹柳花。漂泊入虛牖。  
喧喧車馬場。能有此樂否。人生不得意。胡然事奔走。  
昨朝美少年。今日成老醜。諒非松柏姿。浩歌忘白首。

擬古

丘濬

依依重依依。不忍生別離。別離已可悲。况值秋風時。  
柳衰不堪折。情悲不堪說。願妾爲小星。君身化明月。  
明月貼天飛。小星恒相隨。月出星亦出。月歸星亦歸。  
莫學秋胡妻。相逢不相識。生者固可慚。死者亦何益。

秋懷

何喬新

白露悴秋草。玄蟬寂無聲。庭柯斂新翠。竟夕寒蟬鳴。



感此時序易披衣坐前榮仰視天宇間銀河隔雙星  
一蒂亮可杭相望未合并玄運亦多阻矧茲塵俗情  
援琴鼓別鶴感我淚交零

送張司諫轉南京御史

陳政

遊魚樂深淵幽鳥依茂林物性各有適云胡鬱冲襟  
王明思獻納霄漢我朝簪風紀振譽髦往往爲商霖  
遙辭易水曲還望鍾山岑故園喜瞻宇移祿遂初心  
慷慨酌君別浩然發長吟

秋窓爲袁鑑賦

玄穹回素序化運無停機金風振林薄玉露沾裳衣

叢菊獻佳色崇蘭布芳猗莎鷄當戶鳴熠燿乃宵飛  
志士感物變胡能自睽違結構負巍嶂開窓俯清漪  
燃燈繼日晷深造遂忘疲游心千載上騁足萬里期  
川逝以自勗永言揚德輝

送遠行

沈周

行矣去君側去去那復留會面諒已難徘徊滋隱憂  
五里臨清川十里陟崇丘轉盼路何迥馳心同水流

思遠行

露下芳草歇寒氣薄重幃幽處心獨驚行念君子衣  
君子別既久嗣音亦已稀愁來不成織空對流黃機



揮泪如泉水。明燭無光輝。

申生怨

李東陽

十日進一胙。君食不得嘗。讒言豈無端。兒罪誠有名。  
兒心有如地。地墳中自傷。身不如犬。犬得死君傍。  
天地豈不廣。日月豈不光。悲哉復何言。一死以自明。  
夜過邵伯湖  
蒼蒼霧連空。冉冉丹墮水。飄飄雙鬢風。恍惚無定止。  
輕帆不用楫。驚浪常在耳。江湖日浩蕩。行役方未已。  
羈懷正愁絕。况乃中夜起。

秋興

陳獻章

西風振庭木。虛堂夜蕭蕭。攬衣起步。月歸鴈雙飄。  
天地豈有獨知音。不可招。真心祈有合。悵望空雲霄。

有懷李世卿二首

仙鶴去不歸。黃鸝向人語。空館忽相思。雲山杳何許。  
出門望東海。默默空延佇。月出潮復來。鳴橈下滄渚。  
伏枕廬岡下。幽懷慘不舒。哀絃久去耳。風韻今何如。  
灼灼花自媚。嚶嚶鳥相娛。高臺夕流眄。古道行人踈。

涉鯉洲海

夕舫凌大江。北風吹我席。宜宜鯉洲烟。宛對君山碧。  
來鴈知天寒。歸人看月色。超超塵外心。浩矣周八極。



懷古田舍和陶韻

君子固有憂不在賤與貧農事久不歸道路竟徒勤  
青陽動芳草白日悲行人沮溺去千載相知恒若新  
出門轉窮厄得已聊一欣甘雨濡夕晡繁花幕春津  
獨往亦可樂耦耕多近鄰百年鼎鼎流永從耕桑民

歸田園和陶韻

我始慚名羈長揖歸故山故山樵採深焉知世上年  
足名鳥捨揄非曰龍潛淵東籬采霜菊西渚收菰田  
游目高原外披懷深樹間禽鳥鳴我後麋鹿遊我前  
泠泠玉臺風漠漠聖池烟閒持一觴酒歡飲忘華顛

逍遙復逍遙白雲如我閒乘化以歸盡斯道古來然

題竹

莊景

獨行湘江濤見此藜篁幽風雨日冥晦萬雀聲啁啾  
垂垂正結實恐為鷓鴣謀豈無九苞羽飛下十二樓  
延佇久不見此意良悠悠我因王者瑞極意垂鴻猷  
採之欲往食道路阻且脩問之在何所乃古西康州  
西康有西伯已矣三千秋至尊應昌運致此能無由  
清時一再覩咄哉何所求

悲管孺人

張弼

黃鶴雙雙飛雄死雌獨歸血口銜墜羽鍛翼覆孤兒



巢冰不言冷，啄雪不言飢。茫茫海波澗，節節南山夷。  
山夷海自澗，我足終不移。我足終不移，我心天地知。  
九泉遇故雄，畧不愧當時。豈獨韓朋木，終爲連理枝。  
送陳公甫膺聘之京

勢利不我惕，貧賤不我戚。委曲義理途，飄然若無跡。  
問我今行藏，而我亦未識。扁舟倚江沙，浩歌秋月白。

金臺懷古

張泰

燕昭昔好士，高築黃金臺。卑身事郭隗，賢路從茲開。  
豈不得辛衍，樂毅乃雄才。感激東破齊，呼吸成風雷。  
信義傾諸侯，其如惠王猜。犇趙失神駿，委師任駑駘。

兵頽火牛下，宿耻除復來。荒哉築臺意，長使後賢哀。

擬古四首

黃瑜

招搖復招搖，行子何所之。雲山浩茫茫，萬里以爲期。  
江南兩滑道，朔北風裂肌。襜裘不自豫，中路當依誰。  
塵霾起天末，耀靈隱崦嵫。牛羊各知家，栖鷄尚知埒。  
馳驟失其路，安用輪輻爲。

太極涵萬始，羲娥運靈景。春聲殷木杪，池塘噪蛙黽。  
彼美林居子，歛神發深省。月出千山曉，雲來萬壑暝。  
抱獨人不知，竹風吹松影。  
英英隴上雲，隨日通晴陰。汎汎河中木，與波自浮沉。



浩蕩雲水中。軫茲鬱陶心。我心良足傷。結交費黃金。  
昔日繁華地。悲風集枯林。去去五湖上。綠葦聽琴音。  
大鵬起南溟。鼓翼天池翻。九萬搏扶搖。一息諒何難。  
朝棲若木陰。夕宿昆崙端。胡然恣飲啄。將使風露乾。  
冥冥天際鴻。漸漸興于磐。君子不素飽。居賢誠所安。  
暑雨嘆

驕龍走平陸。長空浩洪濤。天瓢翻不絕。雨師何乃勞。  
出門畏無車。衢路多野蒿。后土吹未乾。庭樹空蕭騷。  
兀坐情無言。蚯蚓向我號。須臾赫羲輪。六合成鑪鍬。  
炎涼每如此。嗟嗟天蓋高。

贈甯道士

剛風起鵬溟。夢結紫霞賞。白日生羽翰。玄珠失象罔。  
長離與商皇。招我流鈴響。聳身登鬱羅。條然躡虛朗。  
玉娥拂我衣。謂我稅塵鞅。何年同爾游。逍遙披鶴氅。

秋日閒居

吳寬

委巷寡人跡。杳無塵俗侵。虛窓對高樹。日午落疎陰。  
玄蟬響方斷。好鳥復一吟。俯首閱陳編。直窺古人心。  
抱冲世味薄。處寂佳境深。涼風滿衣袖。自起彈吾琴。  
琴聲和以暢。永日有餘音。

冬日感興

文林



落不園林空方池水深碧物色垂澹清湛然屏人跡  
杖藜撫孤松復坐松下石西山入懷青寒鳥歛歸翻  
浩浩宇宙間流光自相迫大化豈有終初陽潛地脉

和林見素次蘇子卿見寄韻 王鏊

向晚心不怡中庭立徘徊群雅競鳴噪孤鴻獨無依  
無依亦何為稟氣與時乖物情逐時好志士多苦懷  
咄哉賈太傅厝薪胡獨悲黃竹有遺歌至今令人哀  
籠鳥望雲端自傷翊翎摧海濱有大老何時當來歸  
知音苟不存五絃徒自揮悵望武夷雲我身安得飛

和蘇子卿寄守溪元老

林俊

役役歲云暮俛仰時徘徊長鴻何冥冥失侶難因依  
和鳴豈不念知音良獨垂撫樹動遙感秋至無好懷  
繁華變蕭索時過寧不悲野陰日西夕寒蛩送餘哀  
不見盛年好祇見容貌摧試問東逝流到海何時歸  
洞庭今夜月一觴爲誰揮願附雙雲翼吳山來去飛

山水圖爲鄭山齋題

林居有奇勝聯馬經溪橋歌曲豈不念猿鳥時見招  
青松夾路徑谷口歸雲樵田澆水泉縮屋古風蕭蕭  
群峯翳寒日秋氣橫參寥霜鍾僧寺近僻悄無紛囂  
解衣作小憇香茗談前朝



席上賦史巽仲歸雲洞

儲罐

悠揚蒲洞中歸來不知處曉起語農人春田夜多雨  
却問洞中雲何時下山去

雜詩

石瑤

涼風動書幔彷彿西南來庭柯下露葉哽咽通相催  
瓜萼滯宿雨裊裊蒙塵埃草虫階下鳴流螢亦徘徊  
坐感歲事速忽如車輪推門前有層城層城復高臺  
乘風欲登眺仰溯天漢迴帝子不可見青鳥非良媒  
中夜耿深憂淚落秋生苔

明音類選卷之二





